



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

E Libris


Arturi S. Napier.



CH 38 [Law]



300002873N



LAURIN

EIN TIROLISCHES HELDENMÄR

AUS DEM

ANFANGE DES XIII. JAHRHUNDERTS

HERAUSGEGEBEN

VON


KARL MÜLLENHOFF

ZWEITE AUFLAGE

BERLIN.

WEIDMANNSCHE BUCHHANDLUNG

1886.



LAURIN

EIN TIROLISCHES HELDENMÄRCHEN

AUS DEM

ANFANGE DES XIII. JAHRHUNDERTS

HERAUSGEGEBEN

VON

KARL MÜLLENHOFF

ZWEITE AUFLAGE


BERLIN

WEIDMANNSCHE BUCHHANDLUNG

1886

Abgesehen von der verbesserung einiger druckfehler unterscheidet sich diese zweite auflage von der ersten nur in einem punkte: die lücke nach vers 1812 ist im anschluss an 1775 f. und 1816—18 ausgefüllt worden, ein versuch, zu welchem mir Müllenhoff schon nach erscheinen der ersten auflage seine zustimmung gab. die zählung der verse ist also von 1813 an verändert.

Max Roediger.



Ez was ze Berne gesezzen
 ein deggen sô vermezzen,
 der was geheizen Dietrich:
 niender vant man sîn gelich
 bi den selben ziten. 5
 in stürmen unde in striten
 torste in nieman bestân:
 er was ein wunderküene man.
 er lebte ân alle schande.
 die tiursten in dem lande 10
 die wârn im alle undertân:
 er was ein fürste lobesam.
 die sînes landes phlâgen,
 wie selten si verlâgen
 êre unde frûmekeit! 15
 schande und laster was in leit,
 und swâ si gesâzen,

wie selten si vergäzen,
 si pristen in für alle man
 den edelen Berner lobesam. 20

Alsô sprach Wielandes sun,
 ein ritter biderbe unde frum
 'ich enweiz in allen landen
 deheinen der ân alle schande
 lebe als der edele Dietrich. 25
 niender vint man sîn gelich
 der sô grôziu dinc habe getân.
 man sol in loben für alle man.'

Dô sprach meister Hildebrant
 'im ist âventiure unerkant 30
 in den hollen bergen;
 der phlegent diu getwerge.
 des muoz man in von schulde jehen:
 swer ir âventiure wil sehen,
 der kumt in angst unde in nôt: 35
 si slahent manegen helt tôt.
 dâ hât er selten mite
 deheinen kumber erliten.
 und hiete er den gesiget an,
 ich wolde in loben für alle man.' 40

Die wîle was der Berner komen
 und hete ir beider rede vernomen.

er sprach 'meister Hildebrant,
von Garte ein wiser wigant,
und wær diu rede ein wârheit, 45
du hetest mirz lange vor geseit.'

Hiltprande tete diu rede zorn.
er strâfte den fürsten hōchgeborn
'swer wil sîn ein biderbe man,
der sol sîn rede verborgen hân 50
unz er merke wie manz kêre:
sô hât er tugent unde êre.

ich weiz einen kleinen man,
dem ist vil wunders undertân:
der ist kûme drîer spannen lanc. 55
er hât manegem âne sînen danc
hant und fuoz abe geslagen,
daz wil ich iu für wâr sagen,
der grōzer was dan sîn drî:
den machte er aller sorgen frî. 60
er ist Laurîn genant.

im dienen alliu wildiu lant,
diu getwerc sint im undertân.
er ist ein kûnec lobesam, 65
kûnest aller manne.
in tiroleschen landen
hât ez im erzogen zarte

einen rösengarten.

daz diu mûre solde sîn,

daz ist ein vadem sîdîn.

70

swer im den zebræche,

wie balde er daz ræche!

der müeste im lâzen swæriu phant,

den zeswen fuoz, die linken hant.'

Dô sprach von Berne er Dietrich

75

'ez ist ein degen hêrlîch.

hân ich nu iender sellen

der ez mit mir wâgen welle,

ich wil suochen die rösen rôt,

und solde ich komen in grôze nôt.'

80

Dô sprach Witege der degen

'ich muoz der reise mich verwegen

mit iu, vil lieber herre mîn.

ich wil iwer geselle sîn

dort hin ze dem garten,

85

dâ wir âventiure warten.

wird ich den garten sihtec an,

den trite ich nider in den plân.'

Ûz riten die birsære

durch hovelfichiu mære.

90

daz eine was her Dietrich

von Berne ein fürste lobelîch,

daz ander was der snelle
her Witege sîn geselle.
dô riten die zwêne degene balt 95
birsen ze Tirol für den walt.
dô die zwêne küene man
kômen in den grünen tan,
dô riten si bî einer wile
des waldes wol siben mîle. 100
dô kômen die helde küene
ûf einen anger grüne
für einen rôsengarten.
mit guldînen borten,
mit golde und mit gesteine, 105
het Laurîn der kleine
die rôsen schöne behangen.
in mohte niht belangen
swer in solte sehen an;
der muoste al sîn trûren lân. 110
vil wünne an dem garten lac:
die rôsen gâben stüezen smac
unde dar zuo liechten schîn.
des kômen si in grôze pîn.
Dô sprach von Berne er Dietrich 115
daz wort gar gezogenlîch
'Witege, lieber selle mîn,

daz mac wol der garte sîn,
 dâ von uns Hiltprant hât geseit.
 ich fürht wir komen in arbeit, 120
 als verre ich mich kan verstân.
 des garten phliget ein biderbe man.
 die rôsen gebent sîezen smac:
 beide naht unde tac
 mœht mich ir niht verdriezen, 125
 der uns iht hinne lîeze.'

Dô sprach Witege der degen
 'sîn welle dan der tiuvel phlegen
 mit seltsænen sachen,
 ich muoz im minner machen 130
 der hœchvart an dem garten.
 erbeizet von dem marke.'

Do erbeizten die helde kîene
 nider ûf die grûene.
 Witege der wîgant 135
 sluoc die rôsen abe zehant
 in dem rôsengarten.
 die guldînen borten
 wurden getreten in den plân:
 daz gesteine muost sîn schînen lân. 140
 alsô wir ez haben gehœret,
 diu wunne wart dâ zestœret,

swaz freuden an dem garten lac.
die rôsen liezen iren smac
und dar zuo ir liechten schîn. 145
des kômen si in grôze pîn.
der vadem wart zebrochen:
daz wart an in gerochen.
si sâzen nider in daz gras,
ieglîch sîns leides vergaz. 150

Sehet dô kam dort her geriten
ein getwerc mit swinden siten,
daz was Laurîn genant.
ein sper fuort ez in sîner hant
bewunden wol mit golde, 155
als ez ein fürste solde.
vorne an dem spere sîn
dâ swebete ein banier sîdîn,
dar ane zwêne winde
sam si liefen swinde 160
in einem wilden walde
nâch einem wilde balde.
si stuonden als si lebeten
dâ sie an dem banier swebeten.
sîn ros was ze der sîten vêch 165
und in der grœze als ein rêch.
dar tîfe ein decke guldîn

gap in dem walde liechten schîn
von gesteine als der liehte tac.
der zom der an dem rosse lac 170
der was rôtguldîn,
als in der kleine Laurîn
hâte in der linken hant
dâ er die zwêne fürsten vant.
der satel tîf dem rosse sîn 175
der was helfenbeinîn;
der satelboge gap liechten schîn,
dar an lac manec rubîn.
sîne stegereife wâren rîch,
dar inne stuont ez ritterlich; 180
sîn beingewant rôt als ein blut,
dehein swert wart nie sô guot
daz ie sô wol getohte
daz dar tîf geheften mohte.
sîn brünne was unmâzen guot, 185
si was gehert in trachenblut,
von golde gap si liechten schîn:
kein swert moht nie sô guot sîn
daz si möhte gewinnen;
si was geworht mit sinnen. 190
dar umbe lac ein gûrtelîn;
daz mohte wol von zouber sîn,

dâ von hât ez zwelf manne kraft:
des wart ez allez sigehaft.
ez fuorte ein swert umb sinen lîp, 195
dâ mite huop ez manegen strît,
daz was einer spanne breit:
îsen stahel stein ez sneit.
sîn gehilze was guldîn,
der knopf gap ouch liechten schîn, 200
dar ûz schein der jâchant:
daz swert was bezzer denne ein lant.
sîn wâpenroc was sidîn,
von gesteine gap er liechten schîn,
von maneger hande sachen 205
mit zwein und sibenzec vachen.
den fuorte ez zallen zîten
in stürmen und in strîten.
sîn helm was rôtguldîn,
dar ane lac manec rubîn 210
und dar zuo der karfunkel:
diu naht wart nie sô tunkel,
ez lûhte als der liehte tac
vom gesteine daz am helme lac.
dar ûfe ein krône von golde 215
sam si got selbe wûnschen solde.
ûf der krône obene

sungen wol die vogele,
in allen den gebæren
sam si lebende wæren. 220
mit listen wart ez erdâht
und mit zouber dar brâht.
ez fuorte ein goltvarwen schilt,
der wart mit speren nie verzilt,
dar an von golde ein lêbart, 225
sam er ouch wolte an die vart:
alsô stuont er sam er lebete
und nâch anderm wilde strebete.

Laurin kam für geriten,
die fürsten heten sîn gebiten. 230
dô ez in kam sô nâhen
daz siz beide ane sâhen,
dô sprach Witege der degē
'got mûeze unsers heiles phlegen,
Dietrich lieber selle mîn. 235
daz mac vil wol ein engel sîn,
sente Michahêl der wise,
und rîtet ûz dem paradise.'
dô sprach der von Berne
'den engel sihe ich gerne: 240
den helm soltu verbinden baz,
ich fürhte er trage uns beiden haz.

und ist sîn eigen dirre plân,
sô hât ez guot reht dar an.'

Dô ez in kam sô nâhen, 245
si begunden ez enphâhen:

die fûrsten hœchgeborne
gruozt ez ûz grôzem zorne
'wer hât iuch tœren geheizen
her nider ûf den plân erbeizen 250

und iuwer gurren spannen
ûf minen grûenen anger,
den ich hân geheien

vor manegem tœrschen leien
und beschirmet vor manegem man? 255

ir mûezt mir swæriu phant lân.
wer hât iuch esele her gebeten
daz ir mir habet nider getreten
die mîne lieben rœsen rôt?

des kumet ir in grôze nôt: 260

ietweder gebe mir ein phant
den zeswen fuoz, die linken hant.'

Des antwurte im her Dietrich
harte wol gezogenlîch
'neinâ, du vil kleiner man, 265

du solt dînen zorn lân.
man sol niht fûrsten phenden

bî fûezen und bî henden,
die wol geben rîchen solt
beide silber unde golt. 270

hin gegen des meien zît,
sô got die sumerwunne gît,
sô kument uns ander rôsen vil.
für wâr ich daz sprechen wil:
man sol niht fürsten phenden 275
bî fûezen und bî henden.

ich hân guotes alsô vil
daz ich dir phant niht geben wil.'

Daz getwerc was sprûche frî.
'ich hân mêr goldes dan dîn dri,' 280
alsô sprach der kleine Laurîn.

'waz fürsten müget ir gesîn?
und sît ir zwêne edel man,
ir habt unedellich getân.
waz habet ir gerochen 285

daz ir habet zebrochen
den mînen rôsengarten?
und die guldînen borten
habt ir getreten in den plân,
und hân iu nie kein leit getân. 290

hæt ich iu ie getân kein leit,
ir soldet mir hân widerseit

und hætet mich dar umbe bestân:
daz wære fürstelich getân.'

Dô sprach Wielandes sun, 295
ein ritter biderbe unde frum
'daz hœrt ir wol, her Dietrich,
ir tuot ab niender dem gelich
daz ir sît ein kûnec lobesam,
und lât sulch rede für ôren gân. 300
der kleine ist sô tumber site
und redet uns sînen willen mite
und sînen grôzen übermuot:
ob ez iuch herre diuhte guot,
entriuwen bî den fûezen 305
ichz umb die want slûege.'

Dô sprach der Bernære
'got ist ein wunderære.
ob got sîn wunder hât getân
und geleit an disen kleinen man, 310
west ez an im niht manheit,
ez enhete uns niht sô vil geseit
als üppiger mære.'
sô sprach der Bernære
'für wâr ich daz sprechen sol: 315
in êret ouch diu werlt wol
an dem gotes êre lît,

billiche zaller zît
 mit triuwen und mit êren.
 nu volge mîner lêre 320
 hie ûf dirre grûene:
 wis kûene und niht ze kûene.
 swer wil sîn ein biderbe man,
 der sol fûr êren lâzen gân
 und tuo als er niht hœre 325
 swaz sîn gemûete stœre,
 unz in diu rehte nôt gêt an;
 so erzeige er danne waz er kan,
 unde belîbet âne schande
 in einem ieslîchem lande.' 330

Witegen tete diu rede zorn,
 er strâfte den fûrsten hœchgeborn
 'swer giht ir sît ein kûener man,
 zwâr der muoz liegen dar an,
 swer sprichet daz ir sît ein recke. 335
 nune tœrstet ir niht erschrecken
 eine mûs, fûrhtet ir daz kleine
 daz dort habet vor dem steine.
 dâ getrûwet ir niht vor genesen,
 der unser einer mœhte verwesen 340
 driu tûsent oder mêr.
 ich od ir wær im ein her.

wande daz got wol weiz,
ez rîtet ein ros als ein geiz;'
alsô sprach der starke man, 345
'ich tôrste sîn tûsent bestân.'

Dô sprach der kleine Laurin
'her Witege, ir wellet übel sîn,
ir wellet gar der tiuvel wesen.
mac aber ieman vor iu genesen 350
und sît ir ein biderbe man,
von êrsten sult ir mich bestân.
ich wil iu tragen sunderhaz.
ir gûrtet iuweru rosse baz
und dunke ez iuch gefûege, 355
iuwer fûrgebûege.
ez muoz ein just von uns geschehen,
ez môhte ein keiser ane sehen.'

Witege der vil kûene man
erbeizte ûf den grûenen plân. 360
fûr wâr sult ir wîzen daz:
dô gurte er sînem rosse baz,
ez dûhte ouch in gefûege,
er gurt sîn fûrgebûege.
ân stegereif in den satel er spranc: 365
des seite im Laurin guoten danc.
bî den selben stunden

die helme si verbunden.
 gegen einander si dô stuben
 als zwêne valken die dâ flugen, 370
 der eine grôz, der ander kleine,
 wan Laurîn was kurzer beine.
 her Witege vervælde sîn:
 dô traf in daz getwergeln,
 ez stach in nider in den klê. 375
 kein laster tete im nie sô wê.

Laurîn der küene
 erbeizte ûf die grüene.
 dô wolde ez nemen swæriu phant,
 den zesewen fuoz, die linken hant. 380
 und wær der Bernære niht komen,
 ez wæren swæriu phant genomen.
 des gewaltes den Bernære verdrôz.
 daz swert er über Witegen schôz:
 'neinâ, vil kleine Laurîn, 385
 lâ den helt geniezen mîn.
 jâ ist er mîn geselle,
 daz wizze swer der welle,
 und ist mit mir ûz komen.
 würden im solhiu phant genomen, 390
 des hiete ich iemer schande
 swâ man ez in dem lande

seit von dem Bernære!

daz wærn mir hertiu mære.'

Dô sprach der kleine Laurin 395

'waz gibe ich umbe den namen din?

du sagest mir ein mære

von dem Bernære:

dâ von ich vil hân vernomen.

mir ist lieb daz du her bist komen. 400

des muost du mir lân swæriu phant,

den zeswen fuoz, die linken hant.

ich wil dich bringen inne

mîner krefte und mîner sinne.

du zebræche mir mînen garten, 405

mîne rôsen und die borten

die trâtet ir mir in den plân:

des wil ich iuch engelten lân.

ich endunke iuch nie sô kleine,

wær iuwer gemeine 410

ein tûsent oder drî,

der wolte ich gewaltet sin.'

Her Dietrich von der rede lie,

ze sînem rosse er dô gie.

ân stegereif in den satel er spranc, 415

des seite im Laurin guoten danc.

daz getwerc wolde er stôzen,

daz sper begunde er vazzen
ritterlîchen in die hant:
dô kam sîn meister Hildebrant 420
und der wûetunde Wolfhart,
der sich an strîte nie verspart,
und von Stîre er Dietleip:
die brâhte ez alle in arbeit.
Hildebrant der wîse man 425
rief sînen herren an
'vil lieber Bernære,
nu hœrâ disiu mære.
vernimestu niht mîne lêre,
sô verliusestu dîn êre. 430
ja erkennest du des twerges niht,
dîn rîten ist gein im enwiht.
sold al diu werlt dir gestân,
ez sticht dich nider an den plân;
sô vliusestu dîn êre 435
und getarst ouch nimmer mære,
du vil tugenthafter man,
an keines fûrsten stat gestân.
ich râte dir, ritter kûene,
erbeize nider ûf die grûene, 440
ze fuoze soltu ez bestân.
niht baz ich dir gerâten kan,

und nim in dīne sinne,
du maht sīn niht gewinnen
durch sīn vil guot gesmīde 445
mit keiner hande snīde.
helt, du solt tuon daz
und versuoche dīne sterke baz:
slahez mit dem knopfe umb diu ôren
unde mache ez ze einem tôren. 450
dir enwelle got niht bī stân,
sô gesigest du im an.'

Her Dietrich des niht enliez,
er tete als in sīn meister hiez,
er erbeizte nider ûf den plân. 455
dô sprach der grimmige man
'Laurīn, dir sī widerseit.
nu rich an mir dīn herzenleit.'
dô sprach der kleine Laurīn
'entriuwen, herre, daz sol sīn.' 460
den schilt ez vazzen began,
den Bernære lief ez an.
ez sluoc im einen swinden slac
daz sīn schilt ûf der erden lac.
her Dietrich zûrnen began, 465
Laurīnen lief er vaste an.
er sluoc ûf sīnes schiltes rant

daz er im viel ûz der hant.
er moht mit sînen sinnen
Laurînes niht gewinnen. 470
her Dietrich von Berne
het ez betoubet gerne,
als er von Hiltprant hete gehœret.
er wolde ez haben betœret,
er sluoc den kleinen Laurîn 475
mit dem knopfe ûf den helm sîn
daz ez alsô lûte erklanc
einer halben mîle lanc
von des helmes dône
und der guldinen krône. 480
Laurîn der kuonheit vergaz,
ez enweste wâ ez was.
ez greif in daz teschelin
und nam ein tarnkeppelin,
der vil kleine recke, 485
daz er sich dâ mite bedecke,
daz sîn der Berner niht ensach.
des kom er in grôz ungemach.
er sluoc im an den stunden
manec tiefe verschwunden 490
daz dem getriuwen man
daz bluot durch die brünne ran.

Dô sprach der von Berne
‘nu sliege ich dich gerne.
ich enweiz wâ du bist hin komen 495
oder wer dich mir hât genomen.
du bist in kurzen stunden
vor mînen ougen verschwunden.’
her Dietrich der wigant
sluoc nâch im in ein steinwant 500
mit grôzem zorne unde nît
einer ellen tief unt wît.
Laurîn der kleine man
lief aber hern Dietrichen an:
dô sluoc ez nîtliche 505
ûf den fürsten rîche.
her Dietrich sich wol verstuont
als die wîsen alle tuont;
des betwanc in grôziu nôt:
sîn swert er im ze schirme bôt. 510
Hildebrant der wîse man
rief aber sînen herren an
‘wirstu von dem twerge erslagen,
ich kann dich nimmer mêr verklagen.
und wolde ez mit dir ringen, 515
sô mœht dir baz gelingen.
helt, sô lâz ez von dir niht,

sô wirt im sîn keppelîn enwiht.
 dô sprach von Berne der küene man
 'kæme ich ez mit ringen an, 520
 lîhte gelunge mir baz.'
 dem twerge truoc er alrêst haz.
 Laurîn sich des schiere versan
 daz dër tugenthafte man
 ringens an im gerte, 525
 wie schiere ez in gewerte!
 sîn swert warf ez ûz der hant,
 hern Dietrichen ez underspranc,
 den selben risen ez gevie
 sô krefticlîchen umb diu knie: 530
 si vielen beide in den klê.
 Dietriche tete diu schande wê.
 Dô sprach meister Hildebrant,
 von Garte ein wiser wigant
 'Dietrich, lieber herre mîn, 535
 zebrich im das gûrtelîn,
 dâ von hât ez zwelf manne kraft,
 sô maht du werden sigehaft.'
 ir ringen was michel unde grôz,
 daz sîn den fürsten gar verdrôz. 540
 her Dietrich was ein zornic man,
 man sach im von dem munde gân

sam von der esse tuot daz fluwer.

alliu güete was im tiuwer.

er greif im in daz gürtelîn: 545

ûf huop er daz getwergelîn,

von Berne der vil werde,

und stiez ez ûf die erde

daz im sîn gürtelîn zebrach:

des kom ez in grôz ungemach. 550

Daz gürtelîn viel ûf daz lant:

ûf zucte ez meister Hildebrant.

zwelf manne sterke hete ez vlorn.

hern Dietrîche was vil zorn,

er sluoc ez nider ûf den plân. 555

dô schrei daz twerc wûnnesam,

daz ez alsô lûte erhal

über berc und über tal.

Laurîn der vil kleine man

rief hern Dietrîchen an 560

‘wurde du ie ein biderbe man,

des soltu mich geniezen lân.

helt, nu friste mir mîn leben,

ich wil mich dir für eigen geben,

und wil dir wesen undertân, 565

und dar zuo allez daz ich hân.’

Laurînes bete was enwiht,

der Berner hete der güete niht.
 er sluoc ez nider ûf die grüne.
 daz erbarnte die helde küene. 570
 Laurin der kleine man
 rief dô Dietleiben an
 'hilf mir, werder Dietleip,
 von Stîre ein ritter unverzeit,
 du solt mich des geniezen lân 575
 daz ich dîn rehte swester hân.
 nu hilf mir, degen hêre,
 durch aller frouwen êre.'
 her Dietleip des niht enliez,
 ze hern Dietrich er dô lief 580
 'edeler herre Dietrich,
 von Berne ein fürste lobelîch,
 gebet mir den kleinen Laurin
 als liep iu alle ritter sîn.'
 Dietleibes bete was enwiht, 585
 der Berner hete der güete niht.
 Dietleip der junge man
 rief aber hern Dietrichen an
 'gebt mir den kleinen Laurin,
 als liep iu alle frouwen sîn.' 590
 dô sprach von Berne er Dietrich
 daz wort harte zorneclîch

‘dîn bete ist gegen mir enwiht:
Laurins engibe ich dir niht.
ez hât mir leides vil getân, 595
des wil ich ez engelden lân.’
‘neinâ’, sprach Dietleip der degen,
‘ir sult mir den zorn ergeben,
vil edeler voget von Berne;
sô wil ich iu dienen gerne 600
und wil iu wesen undertân
die wîle ich daz leben hân.’
Dietleibes bete was verlorn,
daz machte hern Dietrîches zorn.
‘niemannes ez geniezen kan, 605
ez muoz im an daz leben gân,
sold ich dîn dienst hân verlorn.’
des wart Dietleibe vil zorn.

Her Dietleip des niht enliez,
ze sînem rosse er dô lief. 610
ân stegreif in den satel er spranc,
daz diu brünne an im erklanc.
er was ein grimmiger man,
daz ros ze beiden sporn er nam,
dô reit er ritterlîche 615
ze hern Dietrîche
‘noch gebet mir daz getwergeln,

als liep iu mīne hulde sīn.
 her Dietrich niht ensprach.
 Dietleip daz an im wol sach 620
 daz er zornec wære
 der edele Bernære.
 er gevie den kleinen Laurin
 bī der liechten brünne sīn,
 er fuorte in über die heide, 625
 ez wære im liep od leide.

Von Berne der vil küene man
 ruofte Hildebranden an
 'heiz mir mīn ros ziehen:
 jā wil ez mir enphliehen 630
 der mir grōz laster hāt getān,
 und mich des niht ergetzen kan.'
 sīn ros zōch man tūf den plān,
 dar tūf saz der küene man.
 im was leit unde zorn, 635
 sīn güete hete er verlorn.
 von zorne gan er wüeten
 'dich enwelle denne behüeten
 der tiuvel tūz der helle,
 ich riche mīnen sellen.' 640

Her Dietrich über die heide rant.
 dō volgte im meister Hildebrant;

Witege unde Wolfhart
die riten ouch an die vart.
her Dietleip der was biderbe, 645
er reit gein im her widere.
Laurin den kleinen man
het er verborgen in den tan.
als er den Bernære ane sach,
daz wort gezogenliche er sprach 650
'noch gebet mir daz getwergeln,
als lieb iu alle tugende sîn.'
Dietleibes bete was verlorn,
daz machte hern Dietriches zorn.
daz sper begunde er senken: 655
Dietleip wold im niht wenken.
sehet die zwêne edel man
riten dō einander an.
ûf einander si dō stächen,
diu sper si beide brächen. 660
do erbeizten die helde klêne
nider ûf die grüne.
under die schilte si sich bugen,
zwei scharpfu swert si dō zugen.
si liefen beide einander an, 665
die zwêne fürsten lobesam.
si huoben den grœzisten strît

den man ie vor noch sit
sach gestriten zwêne man,
alse von in wart getân. 670

von ir striten daz geschach,
si kômen in grôz ungemach:
in was ûf einander zorn.
si trâten unz über die sporn
in d'erde: ir slege wâren grôz, 675
daz ez durch die helme dôz.

man hôrte ir beider swerte klanc
einer halben mîle lanc.
Dietleip was ein grimmeec man,
er lief hern Dietrîchen an, 680

er sluoc den kûenen wîgant
daz im der schilt viel ûz der hant.
her Dietrîch muoste entwichen
vor dem degene rîche.

daz muoste er tuon durch nôt: 685
daz swert er im ze schirme bôt.

Dô sprach meister Hildebrant
'nu dar ir degene beide sant,
ir loufet Dietleiben an.
wir sulns niht langer striten lân.' 690

Witege unde Wolfhart
huoben sich beide an die vart:

daz wâren zwêne starke man.
 si liefen Dietleiben an:
 wol werte sich der junge 695
 unz si in underdrungen.
 dâ bî si niht enliezen,
 daz swert si im in stiezen.
 Hildebrant der wise man
 nam sînen herren hin dan. 700
 er enwolde in niht erlâzen,
 er muost sîn swert in stôzen.
 Hildebrant der wise man
 macht einen fride dar an
 und der kleine Laurin 705
 muoste ouch in dem fride sîn.
 dô kam ez ûz den sorgen
 da ez Dietleip hete verborgen.
 die zwêne fürsten hōchgeborn
 liezen beide iren zorn. 710
 Dietleip der degē unverzeit,
 nâch sînem swâger er dô reit.
 si sâhen in zornlichen an,
 dô er ihn brâhte uf den plân.
 her Witege und her Dietrich 715
 die wâren im gar hazlich:

den zwein fürsten lobesam
hete ez vil leide getân.

Dô sprach Dietleip ze Laurîn
'sagâ, hâstu die swester mîn? 720

daz soltu mich wizzen lân,
sô wil ich dich ze swâger hân.'
dô sprach der kleine Laurîn
'jâ hân ich die swester dîn
êgester morgen 725

genommen unverborgen.
wie selten ich ir vergaz,
die wîle ich in den sorgen was,
der vil lieben frouwen mîn!
si ist ein edel kûnegîn, 730

alliu twerc sint ir undertân,
für wâr ich daz sprechen kan.
wie si mir wart, daz sage ich dir,
daz solt du gelouben mir.

Stîre ein burc ist genant 735
dâ ich die reinen kiuschen vant,
daz merke degen kûene,
under einer linden grûene.

dar was si kurzwîlen gegân
mit maneger meide wol getân: 740
dannoeh huoten ir zwêne man.

mit listen ich si in ane gewan.
dô kom ich hîn zuo geriten
gar nâch ritterlîchen siten,
daz mich nieman ensach 745
und mir ouch nieman zuo sprach.
under die linden ich dâ reit:
dâ vant ich die schoenen meit.
si lûhte ûz den andern schône
als für die sterne tuot der mâne. 750
frou Kûnhilt ist si genant.
ich vienc si bî der wîzen hant,
ûf satzte ich ir mîn keppelîn,
für mich swanc ich daz megetîn:
ich fuort si mit gewalte dan, 755
uns sach enweder wîp noch man.
ich fuort si mit mir in den berc,
dâ dienet ir manec getwerc
und manec getwerginne
mit golde und mit gimme. 760
für wâr ich daz sprechen wil,
ich hân guotes alsô vil
mêr dan alle kûnege hân:
daz ist ir allez undertân.
alsô sprach der kleine, 765
'mit golde und mit gesteine

vergülte ich alliu lant:
 dannoch wold ich haben phant,
 daz wizze sicherliche,
 für driu künecriche, 770
 daz ich niht hieze ein armman.
 daz ist ir allez undertân.'

alsô sprach dô Laurîn,
 'Künhilt diu swester dîn
 diu ist noch ein reiniu meit.' 775
 des fröute sich der degen gemeit.

Dô sprach Dietleip der degen
 'mir ist lieb daz ich mîn leben
 hân gewâget durch den willen dîn.
 lâ mich sehen die swester mîn, 780
 und ist diu rede ein wârheit
 die du mir hâst geseit,
 ich gan dir ir für alle man.'
 'diu wârheit wirt dir kunt getân',
 sô sprach der kleine Laurîn: 785
 'nu wellen wir gesellen sîn.'

Hildebrant der wise man
 nam den von Berne hin dan.
 er sprach 'vil lieber herre mîn,
 ir sult Dietleibes selle sîn: 790
 der ist gar ein starker man

und wil iu mit triuwen bî gestân.
er hilft iu wider mannegelîch.
ich râte iuz, ritter lobelîch.'
des antwurte im her Dietrich 795
harte wol gezogenlîch,
er sprach 'vil lieber meister mîn,
swaz du mir rætest daz sol sîn.'
Hildebrant gie dô zehant
dâ er Dietleiben vant 800
'nu hœrâ, degen hêre,
du hâst des iemer êre,
daz wizze gar ân argen list,
swenne er dîn geselle ist
dem manec recke ist undertân. 805
fûr wâr ich daz sprechen kan.'
dô sprach Dietleip der degen
'des wil ich mich verwegen:
ich hân diu mære wol vernomen.
lât er ze hulden komen 810
mînen swâger Laurîn,
sô wil ich sîn geselle sîn.'
dô sprach meister Hildebrant,
von Garte ein wîser wigant
'daz habe ûf die triuwe mîn, 815
wir mûezen alle gesellen sîn.'

Her Dietleip und her Dietrich
 wider allermannegeleich
 si swuoren dô geselleschaft:
 si heten beide grôze kraft; 820
 und ouch der kleine Laurin
 muost in der sellescheftē sîn,
 also er wære lanc unt grôz:
 Dietleibes er dô genôz.
 wan Witegen was der selle leit: 825
 er vorhte er kæme in arbeit.

Dô sprach der kleine Laurin
 'nu wir alle gesellen sîn,
 sô wil ich uns machen undertân
 mit triuwen allez daz ich hân. 830
 kumet mit mir in den berc,
 sô dienet iu manec getwerc
 und manec getwerginne
 mit golde und mit gimme.
 ir høert dâ kurzewile vil, 835
 gesanc unde seitenspil;
 daz sî iu für wâr geseit.
 ir sehet dâ manec schönheit:
 für wâr ich daz sprechen wil,
 ein jâr ist ein kurzez zil, 840
 dar ane sult ir niht verzagen:

ich enkanz iu halbez niht gesagen,
daz merket âne valschen list,
waz wünne in dem berge ist.
die wil ich iu machen undertân, 845
getürret ir iuch an mich lân.'

Die vier fürsten lobesam
nâmen Hildebrant hin dan.
si frâgten den recken sân
ob si sich solten an ez lân: 850
'daz muoz an dînem râte stân.'
des antwurte in der wîse man
'weste ich waz uns tôhte,
daz ich uns gerâten môhte,
daz tæte ich alsô gerne. 855
vil edeler vogt von Berne,
und wolten wirz durch vorhte lân,
zewâre ez stüende uns übel an.
des hete wir michel schande
swâ man ez in dem lande 860
seite für ein zageheit:
daz wære uns ein smâcheit.'
des antwurte im her Dietrich
mit zûhten harte tugentlîch
'der uns den lîp hât gegeben, 865
der mac wol fristen unser leben.

an den sule wir uns lân,
 wan er uns wol gehelfen kan.
 ich muoz die âventiure sehen,
 solde mir aber leit geschehen.' 870

Dô sprach Witege der degen
 'nu mîeze sîn der tiuvel phlegen
 daz ez uns mit liegen
 alle wil betriegen.'

der wûetunde Wolfhart 875
 sprach 'wir suln billiche an die vart.
 wir mîezen sehen die schönheit,
 dâ von ez uns hât geseit.'

dô sprach meister Hildebrant
 'nu hoerâ, kleiner wigant, 880
 wir weln uns an dîn triuwe lân;
 dâ solt du stæte belîben an.'

dô sprach der kleine Laurîn
 'die wîle ich hân daz leben mîn,
 ich wil iu mit triuwen bî gestân: 885
 ir sult iuch genzlîche an mich lân.'

dô volgten si dem twerge
 gein einem holn berge.
 Witegen was diu reise leit;
 wan ez brâhte si in arbeit. 890

Als si den berc ane sâhen,

si wänden er wære nâhen;
 an dem andern morgen fruô
 kômen si alrêst derzuo.

an dem selben morgen 895

kômen si unverborgen
 für den berc lobesam
 ûf einen wûnneclîchen plân

under eine linde grüene,
 da erbeizten die helde kûene. 900

ir ros sluogen si ûf den plân,
 der was sô rehte wûnnesam.

ûf dem plân stuont bluotes vil,

maneger leie swes man wil
 oder imer erdenken mac: 905

die gâben alle sûezen smac.
 swaz vogeles stimme haben sol,

des was der plân aller vol.

daz was ein michel wunder.

ieglîcher sanc besunder, 910

(man hôrte si wol singen,

ir kel suoze erklingen,)

daz ez undr einander hal

ûf dem anger über al.

maneger hande tiere vil 915

diu triben mit einander spil:

si wâren heimeliche gezemet
 und tûf den selben plân gewenet.
 für wâr ich daz sprechen wil:
 der plân hete freuden vil. 920
 swer in solde sehen an,
 der muoste al sîn trûren lân.

Dô sprach der Bernære
 'zergangen ist mîn swære.
 mich entriegen alle mîne sinne, 925
 wir sîn in dem pardise hinne.'
 dô sprach Wolfhart zehant
 'uns hât got her gesant,
 daz wir dâ heime mugen jehen
 daz uns âventiure sî geschehen. 930
 ich spriche daz für wâr wol,
 der plân ist aller sælden vol.'
 dô sprach Hildebrant der degen
 'ir sult iuwer sinne phlegen.
 daz gevellet mir vil wol: 935
 tac man zâbende loben sol.'
 dô sprach Witege der degen
 'woldet ir mîns râtes phlegen
 und volgen mir aleine,
 ja betrûge uns nie der kleine. 940

er ist der liste alsô vol
daz im nieman getrûwen sol.'

Dô sprach der kleine Laurin
'ir sult ân alle sorge sîn,
mit fröuden hie ûf disem plân, 945
der ist sô rehte wünnesam.

aber diu fröude ist gar ein wint
wider die in dem berge sint.
swenn wir an den luft wellen gân,
sô trete wir her ûf disen plân. 950

ieglîcher macht im einen kranz,
dar nâch trete wir einen tanz
mit manegem rôten mundelîn.
sô zieh wir alle wider in
swaz unser vor dem berge st. 955
als wonet uns lust iemer bî.'

alsô sprach der kleine man
'ich teile mit iu disen plân,
ir herren und gesellen mîn.
er sol unser aller sîn.' 960

do gedâhte im der Bernære
'ein ende hât mîn swære.'
des enwas ez weizgot niht:
ir kurzewile wart enwiht.

Dô zugen si mit einander dan, 965

diu ros liezen si ûf dem plân.
 dô fuorte Laurin daz getwere
 mit im die fürsten in den berc.
 dô si kâmen an daz tûrlîn,
 dâ stuonden zwelif juncfrouwelîn, 970
 die wâren schoene und wol getân,
 si gruozten die recken sân.
 dô si alle kâmen hin in,
 zuo slôz man daz tûrlîn:
 ir keiner moht sô wîse sîn 975
 dêr weste wâ si kômen in
 od dem sîn siune iht tohte
 daz er gesehen mohte.
 dô sprach Witege der starke man
 'zwâre ich liuge niht dar an; 980
 und wære ich dûze aleine,
 mich betrûge nimmêr der kleine.
 ir herren, daz ist niht gelogen,
 ich wæne wir sîn alle betrogen.'
 Dô sprach der kleine Laurin 985
 'ir sult ân alle sorge sîn,
 kein leit iu von mir geschiht:
 ich briche mîner triuwe niht.'
 dô sach man für die fürsten gân
 manegen ritter lobesam, 990

die truogen an das beste gewant
 daz man in allen landen vant:
 von golde gap ez liechten schîn.
 her Dietrich und die sellen sîn
 die wurden wol enphangen. 995

si sâhen obe in hangen
 maneger hande kleinât;
 des hieten sie alles rât.
 allez daz diu werlt sol haben,
 des was der berc vol geladen. 1000

Laurin phlac schöne der hêrschaft.
 von gesinde hete er grôze kraft,
 daz wizzet sicherliche.
 kein kûnec wart nie sô rîche,
 si heten im strîtes gnuoc gegeben: 1005
 nâch kuonheit stuont ir aller leben.

die werden recken unverzeit
 sâhen manege schönheit.
 die benke wâren guldîn,
 von gesteine gâbens liechten schîn: 1010
 dar ûf satzt man die geste.

man tete in daz beste.
 man schancte in mete unde wîn,
 so er aller beste mohte sîn.
 si sâhen kurzewile vil, 1015

maneger leie hande spil:
 einhalb si sungen,
 anderhalb si sprungen,
 si versuochten heldes kraft;
 dar nâch schuzzen si den schaft, 1020
 dar nâch wurfen si den stein:
 als gienc daz spil über ein.
 hurdieren unde stechen,
 sper undr einander brechen,
 des wart vil vor in getân. 1025
 manegen künsterichen man
 man hôrte gîgære,
 harphære und phîfære.
 dô sach man für die fürsten gân
 zwei getwerc wînnesam, 1030
 zwêne kurze videlære:
 ir gewant was rîch und swære.
 si truogen videlen in der hant,
 die wâren bezzer denne ein lant:
 si wâren rôtguldîn, 1035
 von gesteine gâbens liechten schîn;
 die seiten gâben sîezen klanc.
 den fürsten was diu wîle unlanc,
 si hôrten daz videlen gerne.
 dô sprach der voget von Berne 1040

'diu kurzewile gevelt mir wol,
 dirre berc ist fröuden vol.'
 dar nâch sach man für gân
 zwêne wol singende man,
 zwêne guote sprechære. 1045
 hovelichiu mære
 si sungen vor den fürsten vil;
 daz was ir kurzewile unde ir spil.
 si huoben an sô süezet sanc
 daz ez in dem berge erklanc: 1050
 swer ez rehte mohte verstan,
 der muoste al sîn trûren lân.
 Dô kam Kûnhilt diu kûnegîn
 mit maneger kurzen twergîn,
 die wâren schœne und wol getân, 1055
 und truogen richiu kleider an
 von phellel und von sîden,
 dar an daz beste gesmîde
 daz man von silber und von golde
 und von gesteine haben solde. 1060
 daz stuont in allez schœne.
 ein guldine krône
 truoc ûfe diu kûnegîn:
 si enmôhte vergolten sîn
 niht mit einem lande. 1065

dô wurden schöne enphangen
 die gesellen minneclîche
 von der kûneginne rîche.
 'willekomen vil edeler Dietrich,
 von Berne ein fürste lobelîch, 1070
 mir ist liep daz ich dich sol sehen:
 ich hœr dir grôzer tugende jehen
 und dar zuo grôzer manheit
 (dâ ist mir wunder von geseit)
 die du âne schande 1075
 hâst allez her begangen:
 kein laster hâstu nie getân.
 man sol dich loben für alle man.'
 des dankete ir her Dietrich.
 si enphienc die geste alle gelîch 1080
 sô si beste mohte
 und ez ir êren tohte.
 Dietleip si sunderlîche enphie.
 mit armen si in umbevie,
 si halste in unde kusten 1085
 und dructe in an ir bruste:
 si beslôz in mit den armen
 daz ez in muoste erbarmen,
 dô im diu schœne meit
 sô sêre daz ellende kleit. 1090

Er sprach 'vil liebiu swester mîn,
 wiltu niht langer hinne sîn
 in disem holen berge
 bî dem kleinen twerge,
 oder dich von im scheiden lân? 1095
 dir wirt wol ein ander man.'
 si sprach 'vil lieber bruoder mîn,
 sô du sælec müezest sîn!
 ich enhân keinen bresten niht,
 als dîn ouge wol gesiht. 1100
 swes mîn herze eines gert,
 der bin ich viere gewert.
 mîn herze ist aller fröuden vol
 swenn ich den berc an sehen sol
 und al die mîne meide sint. 1105
 dannoch ist mîn fröude blint,
 diz leben wart mir nie liep,
 wande ez ist ein undiet.
 ir werc diu tûgen mir enwiht,
 si geloubent an got niht:' 1110
 alsô sprach diu schœne meit,
 'ich wær gerner bî der kristenheit.
 ich bevilhe mich den triuwen dîn:
 swaz du mir rætest daz sol sîn.'
 dô sprach Dietleip der kûene man 1115

‘schœniu swester wol getân,
ich nime dich dem kleinen man,
sold ez mir an daz leben gân.’

Laurîn der kleine man
die herren hiez ze tische gân. 1120

dô zugen si abe ir sarwât
und leiten ane phellfne wât,
mit golde und mit gesteine;
alsô êrte si der kleine.
die spîse man für truoc: 1125

man gap in alles des genuoc
daz ir lîbe tohte,
alse ez wol vermohte
baz dan alle kûnege hêr;
dannoch hete ez alles mêr. 1130

sîne schûzzeln wâren silberîn,
diu giezfaz gâben liehten schîn
mit golde und mit gesteine,
sîn tisch von helfenbeine,
guldîn an den slozzen 1135

sam si wâern gegozzen.
dô si dô gesâzen,
getrunken unde gâzen
und die tische wurden erhaben,
beide singen unde sagen 1140

huop sich vor den fürsten vil,
 dar nâch manec seitenspil
 daz ez undr einander hal
 in dem berge über al.
 diu kurzwile huop sich wider an 1145
 von manegem twerge wünnesam.

Laurîn gienc sâ zehant
 dâ er froun Künhiltent vant.
 er sprach 'vil liebiu frouwe mîn,
 sô du iemer sælec müezest sîn! 1150
 gip mir dinen getriuwen rât,
 mîn dinc mir kumberliche stât.
 waz mir die recken hânt getân,
 daz wil ich dich wizzen lân.
 si zebrâchen mir mînen garten, 1155
 und die guldînen borten
 trâten si mir in den plân,
 und hâte in nie kein leit getân.
 daz hæte ich allez wol gerochen,
 wær mir mîn gürtel niht zebrochen. 1160
 von hern Dietriches zorn
 hân ich al mîn êre vlorn.
 wolt sichz Dietleip niht nemen an,
 ez müeste in an daz leben gân.'

Dô sprach diu küneginne hêre 1165

'daz überwundest nimmer mære.
 sich an, helt, dîn êre,
 und volge mîner lêre.
 lege si sust ein pîn an
 daz si dich mit gemache lân. 1170
 du solt mir des dîn triuwe geben
 daz du keime tuost an sîn leben.'
 daz gelobte ir daz getwergeln.
 mit gesteine ein guldîn vingerlîn
 stiez ez an sîne zesewen hant: 1175
 dô wart im grôziu kraft bekant,
 zwelf manne sterke ez gewan;
 daz was wunderlîch getân.
 nâch sîme swâger ez dô sant.
 dô kam der degen sâ zehant 1180
 zuo im alsô drâte
 in eine kemenâte.

Dô sprach der kleine Laurîn
 'vil lieber trûtswâger mîn,
 nim dich niht dîne gesellen an, 1185
 sô teile ich mit dir swaz ich hân.'
 dô sprach Dietleip der degen
 'ê wolde ich vliessen daz leben:
 swaz in geschiht, geschehe ouch mir.
 dîner helfe ich wol enbir.' 1190

dô sprach der kleine Laurin
'sô muostu die wîle hinne sîn
unz du gewinnest andern muot
und mîne gâbe nimest verguot.'

Laurines liste wâren grôz: 1195

sînen swâger er verslôz
in der kemenâte.

dô ilte er vil drâte
der vil kleine wîgant
dâ er die vier fûrsten vant. 1200

alsô wir ez hoeren sagen,
trinken hiez er dar tragen,
beide mete unde ouch wîn:
twalm hiez er tuon dar in.

dô si daz dô getrunken, 1205

wie balde si ûf die benke sunken!

wie balde der kleine wîgant

in alliu vieriu zsamen bant!

er warf si in einen karkære,
dâ lîten si inne grôze swære. 1210

si wâren alle sament verlorn,

wan hern Dietriches zorn.

Nu lâgen si gefangen:
wie kâmen si von dannen?

daz enmac niemer ergân, 1215
 der leser muoz ein trinken hân.

Dô si gevie daz kleine twerc
 mit untriuwen in den berc,
 die herren sich versunnen
 daz si wârn gebunden: 1220

her Dietrich einen zorn gevie:
 ein dunst von sînem munde gie,
 der verbrante im sîniu bant.
 dô löste er fuoz unde hant,
 dar nâch ouch die gesellen sîn 1225
 gar ûz einer grôzen pîn.

do enwesten niht die stæten
 wie si ir dingen tæten,
 daz si gewunnen harnasch guot:
 daz was vor in wol behuot 1230
 und verslozzten in dem berge
 von den wilden twergen.

dô lâgen si mit sorgen
 unz an den vierden morgen.
 Frou Kûnehilt diu kûnegîn 1235
 verdacte in dem berge dên schîn.
 daz tete si durch die recken.
 daz gesteine hiez si decken,
 daz man in dem berge niht ensach.

si giengen an ir gemach. 1240

frou Kûnehilt gienc sâ zehant

dâ si Dietleiben vant

in einer kemenâte:

dar flte si vil drâte.

ûf slôz si die tür: 1245

dô spranc Dietleip her für

gar in grimmigem muote.

dô sprach diu kûneginne guote

‘vil herzelieber bruoder mîn,

sô du iemer sælec mûezest sîn! 1250

volgest du niht mîner lêre,

du verliusest lîp und êre.’

er sprach ‘vil liebiu swester mîn,

swaz du mir rætest, daz sol sîn.

nu sage mir ûf die triuwe dîn 1255

wie gehalten sich die gesellen mîn.

sint si lebende oder tût

oder in deheiner hande nôt?’

si sprach ‘si sint gevangen,

daz mich sîn muoz belangen, 1260

tiefe in einem karkære:

dâ lîdent si inne grôze swære.’

Dô sprach der deggen hœchgemuot

‘hiet ich wan mînen harnasch guot

und mîn swert in mîner hant, 1265
 ich löste sie sâ zehant.
 si sprach 'vil lieber bruoder mîn,
 daz du sælec müezest sîn!
 und wærstu sterker dan dîn viere,
 sie erslügen dich vil schiere, 1270
 daz du in siges müesest jehen;
 wan du enmaht ir niht gesehen.
 nim hin ditze vingerlîn,
 vil herzelieber bruoder mîn,
 daz soltu stôzen an die hant, 1275
 sô wirt dir âventiure bekant.
 für wâr ich daz sprechen sol,
 du sihest diu twerc alliu wol.
 si stiez ez ime an die hant,
 des fröute sich der wigant: 1280
 sîn herze wart fröuden vol,
 er sach diu twerc alliu wol.
 'hiet ich mîn brünne und mîn swert,
 des engulte manec twerc,
 ez wære wîp oder man, 1285
 ez müeste in an daz leben gân:
 ich lieze ir kein genesen niet,
 ez ist ein ungetriuwe diet.'
 Si nam in bî der wîzen hant,

dô volgete ir der wîgant. 1290
si fuorte in alsô drâte
in eine kemenâte,
dâ funden si ir aller harnasch guot,
swie wol er was vor in behuot.
von golde gap er liechten schîn. 1295
dô wâpente in diu kûnegîn
mit listen den wîgant.
den helm si im ûf daz houbet bant,
daz swert gap si im in die hant
(daz was bezzer denne ein lant,) 1300
und sînen goltvarwen schilt,
dar an daz merwunder spilt
in allen den gebæren
sam ez lebende wære.
'hœrâ, lieber bruoder mîn, 1305
hûete dich vor Laurîn:
ist daz er dir gesiget an,
ez muoz uns an daz leben gân.'
dô sprach Dietleip der degen
'sîn welle denn der tiuvel phlegen 1310
ûz der bittern helle,
ich lœse mîne gesellen.'
Von der frouwen lobesam
wart dô ûber in getân

vil der guoten segene, 1315
ze helfe dem degene.

si sprach 'got müeze dîn phlegen
daz du behaltest dîn leben.

nu schouwe, in daz gewelbe
truoc man dîne gesellen, 1320

in einen tiefen karkære:

dâ ligent si in grôzer swære.'

dô er die rede alsô vernam,

ir aller harnasch er dô nam

und dar zuo ir guotiu swert, 1325

diu wârn eins kûnecrîches wert.

er truoc si in daz gewelbe

und warf si für die sellen

daz ez alsô lûte erhal

in dem berge über al. 1330

Laurin der kleine man

rief al die sînen an,

im was leit unde zorn.

ez blies lûte ein herhorn

daz ez in dem berge erhal: 1335

daz erhôrten diu twerc über al.

dar nâch gie ez an ein klingen

von rîchen sarringen,

die si leiten an ir lîp

sam si wolten an den strit. 1340

alsô wir ez hân vernomen,
wie schiere wâr diu twerc komen,
driu tûsent oder mêr
für Laurîn den kûnec hêr!

Dô sprach Laurîn der degen 1345

‘ir sult ir keinen lâzen leben,
ir geloube ist enwiht,
wan si getrûwent uns niht.’
dar nâch huop sich ein gedranc,
beide breit unde lanc,

1350

vaste an daz gewelbe dan.
dâ sach man Dietleiben stân.

sîn herze was manheite vol,
er sach diu twerc alliu wol.
er hete eines recken sin,
er spranc under diu twerc hin,
der selbe degen junge:

1355

diu getwerc ûf in drungen.
ûf zôch er daz swert swinde
daz dâ von giengen winde.

1360

er sluoc ir ûzer mâzen vil:
daz was im ein kintspil.
dô Laurîn daz ersach
daz im grôzer schade geschach,

do erzurnde der kleine man. 1365

er lief Dietleiben an:

er sluoc im an den stunden

alsô manec tiefe wunden

daz deme jungen man

daz bluot durch die ringe ran. 1370

Dietleibes swert daz was guot,

als ez der deggen hœchgemuot

in strite hete vil getragen

und durch herte helme geslagen.

iedoch was ez dô enwiht, 1375

wan ez ensneit Laurînes niht.

für wâr ich daz sprechen wil,

der berc hete getwerge vil:

diu sluogen ûf den einen man.

alrêst er strîten began. 1380

er sluoc hinder sich einen slac,

dâ von der twerge vil erlac.

daz enhalf allez niht,

sîn strîten was gar enwiht.

dô drungen si den jungen man 1385

in daz gewelbe wider dan.

Die wîle was meister Hildebrant,

von Garte ein wîser wîgant,

mit listen ûz dem kerker komen

unde hete mit im genomen 1390

sine gesellen schiere:

dô wâpenten sich die viere.

wan Dietleip der junge degen,

diu getwerc heten in daz leben

âne schaden wol genomen, 1395

wær er niht fürz gewelbe komen.

dô wolten si den jungen

dane haben gedrunge:

vaste werte sich der degen,

des vlôs manec twerc sîn leben. 1400

die wîle wâpenten sich sân

die vier recken lobesam.

Dô sprach der von Berne

‘nune streit ich nie sô gerne:

dirre berc ist strîtes vol, 1405

ich enweiz wen ich slahen sol

oder wem ich sol gestân:

nieman ich gesehen kan.’

dô sprach meister Hildebrant

‘ez ist bezzer danne ein lant 1410

daz ich dir, herre, geben sol:

ich gan dir der êre wol

baz denne dem lîbe mîn.

nim hin ditze gürtelîn;

daz soltu gürten umbe den lîp, 1415
 sô sihestu an der selben zît
 diu getwere in dem berge wol:
 für wâr ich daz sprechen sol.
 er gap im den gûrtel in die hant:
 umbe gurte in der wigant. 1420
 sîn herze daz wart fröuden vol:
 er sach diu twere alliu wol,
 und Dietleiben den jungen man
 sach er in grôzen noeten stân:
 sîn harnasch was von bluote rôt, 1425
 sîn swert er im ze schirme bôt.

Er sprach 'vil lieben sellen mîn,
 ir sult under disem gewelbe sîn.
 ir muget der vînde niht gesehen,
 dâ von möhte iu leit geschehen. 1430
 für wâr ich daz sprechen wil:
 ich sihe der twerge alsô vil
 daz ich grœzer her nie gesach.
 diu tuont Dietleibe ungemach,
 sîn harnasch ist von bluote rôt: 1435
 ich enhelfe im, er ist tôt.'
 dô sprach meister Hildebrant,
 von Garte ein wiser wigant
 'Laurîn hât ein vingerlîn

an der zeswen hant sîn, 1440
(helt, vernim minen rât,)
dâ von ez die sterke hât:
slach im den vinger ûz der hant
und brinc mir in sâ zehant.'
des antwurte im her Dietrich 1445
harte wol gezogenlich
'meister, und mac daz geschehen
daz in mîn ougen gesehen,
ich slahe im in ûz der hant
und bringe in dir sâ zehant.' 1450
Dietrich für daz gewelbe spranc.
dô gienc ûf in ein grôz gedranc
von manegem twerge freissam.
Laurîn lief in zehant an:
des fröute sich her Dietrich. 1455
er machte ein wite umbe sich
und sluoc diu getwere hin dan:
er enwolde ir keinen zuo lân.
als wir ez hoeren von in sagen,
wunden wart vil geslagen • 1460
Dietriche durch die brünege:
daz machte der twerge menege.
mit listen unde mit grimme
moht er Laurînes niht gewinnen.

her Dietrich wart ein zornec man, 1465
und lief in ernstlichen an:

zuo der selben stunde
man sach von sinem munde
einen dunst gân der was heiz,
dâ von Laurine der sweiz 1470

vaste durch die ringe ran.
der vil starke küene man
truoc dem getwerge haz.
eins schirmslages er niht vergaz,
den lërte in meister Hildebrant: 1475

er sluoc im den vinger ûz der hant
dar ane ez hete daz vingerlîn.
do erschrac daz getwergelîn.

ûf zucte in der wigant,
unde gap in Hildebrant: 1480
des herze wart fröuden vol,
er sach diu twerc alliu wol.

Die wîle was ein kleinez twerc
her ûz geloufen für den berc,
dem was leit unde zorn. 1485
ez erschalte lûte ein horn.
daz erhörten alsô balde
fünf risen in dem walde.
si sûnten sich niht lange,

mit stehelfnen stangen 1490
kômen si geloufen für den berc.
dar nâch frâgten si daz twerc
daz ez in kunte diu mære.
ez sprach 'diu sint uns gar ze swære
daz ichz niht halbez kan gesagen. 1495
mîme herrn ist sîn gesinde erslagen,
im selben ist gesiget an.
helfet dem fürsten lobesam.'

Die risen drungen in den berc,
des fröute sich vil manec twerc. 1500
diu dâ vor mit sorgen
hieten sich verborgen,
diu sprungen alliu her wider
und liefen zuo den risen sider;
diu vor geflohen hâten, 1505
diu sluogen wider genöte.
die risen wâren freissam,
si bestuonden die zwêne man.

Dô sprach meister Hildebrant
'ich râte iu herren beide sant 1510
daz ir under disem gewelbe sit.
sich hebet aber ein grôzer strît.
ich sihe fünf risen freissam,
die welnt den twergen bî gestân.

si hânt unser sellen für genomen: 1515
 den muoz ich ze helfe komen.'
 den helm er ûf daz houbet bant,
 für daz gewelbe er dô spranc.
 des frönt sich der von Berne,
 si sähen in vil gerne. 1520
 die risen wâren freissam,
 die sach man an die fürsten gân
 mit stehelînen stangen.
 die zwêne muoste belangen:
 man hörte si ûf die helde slân 1525
 einen sturm freissam.
 waz der strît tohte,
 ir deweder gesehen mohte.
 Dô sprach Wielandes sun,
 ein ritter biderbe unde frum 1530
 'Wolfhart, lieber selle mîn,
 sul wir nu die böesten sîn?
 wir verzagten nie an strîten
 bî allen unsern zîten.'
 der wüetunde Wolfhart 1535
 sprach 'wir sulen an die fart.
 dâ wir den strît hoeren gân,
 dâ dring wir mit einander an
 und loufen mit slegen in;

daz ist mîn rât und mîn sin.' 1540

bî den selben stunden

die helme si verbunden,

ieglîcher vazzete sînen schilt:

sehet, dô kom frou Kûnhilt.

'ir sît zwêne biderbe man. 1545

wie wol ich daz gehœret hân!

ich muoz iu grôzer manheit jehen:

ir muget der vînde niht gesehen

und wellet sie doch bestân;

des wil ich iuch geniezen lân.' 1550

frou Kûnehilt diu kûnegîn

gap ieglfchem ein vingerlîn:

'diu stôzet an iuwer hant,

sô wirt iu âventiure bekant.

für wâr ich daz sprechen sol, 1555

ir sehet die vînde alle wol.'

si stiezen sie an die hant:

dô wart in âventiure bekant;

ir herze wart fröuden vol,

si sâhen diu twerc alliu wol. 1560

her Witege und der geselle sîn

nigen der edelen kûnegîn.

die zwêne degene milte

griffen zuo den schilten,

si sprungen für in den berc, 1565
des engalt manec twerc
und ouch die risen freissam.
dô die zwêne küene man
zuo dem strîte sprungen,
ir halsberge erklungen, 1570
ir sprunge wâren wîte:
in was gâch zem strîte.
Nagelrinc und Mimminc
diu tâten freislîchiu dinc.
mit der zweier swerte orten 1575
diu getwerc si niht sparten.
alliu gûete was in tiuwer.
rehte sam ein fluwer
sach man ez von ir swerten gân:
si wunten ir vil manegen man 1580
sunder ungevelle.
dô die fünf gesellen
zuo einander kâmen,
die risen si für nâmen.
si sluogen an den stunden 1585
vil tiefe verchwunden,
daz si in dem bluote
unz über die sporn wuoten.
die risen wâern gerne gewesen von dan:

ieglfcher einen für nam: 1590

si enmohten mit ir sinnen

den recken niht entrinnen.

alsô wir ez hoeren sagen,

die risen wurden erslagen,

Laurîn wart gevangen: 1595

dô was der strît ergangen.

Dô Laurîn daz twerc sach

den schaden und daz ungemach

daz die degene nieman

in dem berge wolten leben lân, 1600

er viel für den Bernære

in alsô grôzer swære

'edeler fürste rîche,

tuo an mir tugentlîche.

ich mînen lîp und mîn leben 1605

ûf dîne genâde hân ergeben.

niht lâz erslahen daz volc gar,

nim dîner tugende an mir war.

dar umbe mûezen si alle sant

dienen dîner edelen hant. 1610

edeler fürste, wer den strît

unde tuo daz bî der zît

ê daz der kleinen twerge her

verderbe gar âne wer.'

Her Dietrich sprach mit zorne 1615
 'du muost sîn der verlorne,
 du und swaz dich gehoeret an;
 den muoz ez an daz leben gân.
 du hâst dîn triuwe an mir zebrochen,
 daz belibet niht ungerochen.' 1620

Daz erhôrte diu schœne meit
 frou Kûnehilt, diu was bereit,
 si huop sich ze hant dan
 dâ si sach den Bernære stân.
 'edeler herre Dietrich, 1625
 einer bete gewer mich:
 des bite ich dich vil sêre
 dur aller frouwen êre.
 gip mir den kleinen Laurîn
 und daz tweregesinde sîn, 1630
 daz du in frist wellest geben
 unde in niht nemen daz leben.'

Des antwurte ir her Dietrich
 harte wol gezogenlîch
 'daz enmac niht wol gewesen 1635
 daz wir diu twerc lân genesen.
 umb die swære diu mir ist getân
 dar umbe mac ez niht bestân.'
 'neinâ, edeler fürste rîch,

tuo diner tugende an mir gelich. 1640
lâ mich niht ungewert hie mite
und tuo noch swes ich dich bite;
wan man vil tugende von dir seit:
die lâz ouch mir sîn bereit.'

Dô sprach meister Hildebrant 1645
'ir sult des wol sîn gemant
daz ir die juncfrouwen wert
swes si an iuch hât gegert;
und lât den kleinen Laurîn
ze Berne iuern gevangen sîn, 1650
und lâzet swern diu getwerge,
daz si iu dienen mit dem berge.'

Dô sprach Dietleip der degen
'ir sult iuwerre zûhte phlegen
und gewert die swester mîn.' 1655
dô sprach her Dietrich 'daz sol sîn.
juncfrouwe, ir sult sîn gewert
des ir an mir habet gegert.'
er rief Witegen unde Wolfhart an
'ir sult von dem strîte lân 1660
unde lât daz volc leben:
ich hân in mînen fride gegeben.'

Si liezen von dem strîte.
daz was an der zîte,

si gedächten umbe ein scheiden dan, 1665
die fürsten edel und lobesam.

si nâmen Laurîn mit in,
dar zuo vil guoten gewin
von golde und von gesteine,
und wurden des eneine 1670

si enphulhen den holn berc
an ein edelez getwerç,
daz was geheizen Sintram,
(ez was ein kûnec lobesam,
der hœhste nâch Laurîne,) 1675
ûf die triuwe sîne.

des swuor ez Dietriche einen eit,
ez wolde im dienstes sîn bereit.

Dô fuoren si mit fröuden dan
und diu juncfrouwe wol getân. 1680

si fuoren hin gên Berne:
dâ sach man si gerne
und enphienc si gûetliche
die edelen fürsten rîche.

dâ heten si kurzwile vil 1685
und maneger leie hande spil.
Dietleip und diu swester sîn
frou Kûnehilt diu kûnegîn
vierzehen tage si dâ beliben.

mit fröuden si die zît vertriben. 1690
dô wolde Dietleip scheiden dan
und diu juncfrouwe wol getân.
si gerten urloubes dà
von herren Dietrîche sâ.
frou Kûnehilt diu rîche 1695
gerte an Dietrîche,
er solt si des geniezen lân
daz si durch in hete getân.
'wizz, edeler fürste, für wâr,
ir wæret alle tôt gar 1700
gelegen ân Laurines schaden.
des bin ich mit riuwen überladen,
wan er mir getriuwelichen tete
und werte mich al mîner bete.
er macht mir allez undertân 1705
daz er ûf der erden ie gewan.
dâ von, edeler fürste rîche,
bit ich dich tugentlîche
daz du mich wellest gewern
des ich an dir wil begern.' 1710
dô sprach von Berne er Dietrich
harte wol gezogenlîch
'juncfrouwe, swes ir an mir gert,
des sult ir genzlîch sîn gewert.'

‘sô muote ich, edeler fürste, an dich, 1715
des solt du gewern mich,
lâ dir Laurîn bevolhen sîn
ûf triuwe und die genâde dîn.
versuoch daz ez den touf enphâ,
und tuo im gûetlich dar nâ 1720
und brinc ez durch den willen mîn
wider an die êre sîn.
wan du in des wol hâst erzogen
daz er dich hât betrogen.’
des antwurte ir her Dietrich 1725
mit zûhten wol gezogenlich
‘juncfrowe, vil gerne tuon ich
des ir habet gegert an mich.’
dâ mite si urloup von im nam,
als ir zûhten wol gezam. 1730
Dô gie si sâ zehant
dâ si Laurînen vant.
si sprach ‘lieber herre mîn,
gote solt du enpholhen sîn:
ich muoz mit mînem bruoder varn; 1735
des enmac ich niht bewarn.’
dô sprach Laurîn zehant
‘ouwê daz du mir wurde bekant!
hân ich mîn triuwe an dir verlorn,

ouwê daz ich ie wart geborn! 1740

ich hete dich mir ze tröste erwelt,
mîner fröuden tage sint nu gezelt.

allez daz ich ie gewan,

möht ich daz mit gewalte hân,

daz wolde ich dar umbe geben, 1745

sold ich dir bî sîn gelegen.'

er schrei sô bitterliche

daz diu küneginne rîche

dô sêre weinen began.

Dietleip ir bruoder si dô nam 1750

unde fuorte si von dan.

er gap ir einen biderben man;

dâ bî hete si fröuden vil

unz an ir lezzistez zil.

Nu lâz wir si mit fröuden zogen. 1755

wir suln von Laurîne sagen

wie dem sîn dinc ergie

und sich sîn leben ane vie.

Hildebrant der sprach sân

'herre, umbe den kleinen man 1760

ir sult tuon als ein wîse man;

und grifetz wîslîchen an,

daz man Laurîn in huote habe

und daz man ez niemanne sage

daz diu frou Künhilt hât gebeten: 1765
 daz sol man gar undertreten.
 man sol in halten wol behuot
 unz man versuochet sinen muot,
 ob er ze kristen leben stê:
 daz sol man ersuochen ê. 1770
 man sol in einem wîsen man,
 Ilsunge dem werden sân
 enphelhen daz er sîn phlege,
 und daz er im den rât gebe
 daz er kristen werde für wâr: 1775
 sô gebe der fürste im hulde gar.'

Des volgete im der werde degen
 und hiez sîn mit huote phlegen.
 er enphalch ez dem wîsen man
 daz er vaste hebte an 1780
 und sagte im umbe kristen leben.
 dâ wolte er sich niht in geben,
 unz im wart erboten sâ
 vil smâcheit von den knechten dâ.
 vil gespotes leiten si in an 1785
 und triben ûz im ir goukel sân.
 daz werte wol zwelif wochen
 daz im vil spotes wart gesprochen.
 er gedâhte in sînem muot

‘unde wære ez mir guot, 1790
sô solde ich kristen werden.
ich sihe wol, ûf der erden
ist sîn name gewaltec gar,
und dienet im der engel schar,
sô miniu göter gar blint 1795
und mir ouch ze nihte sint.
dêr mac wol gewaltec sîn,
daz ist an mir worden schîn.
si enmohten mir gehelfen niht.
ir helfe was gar enwiht, 1800
dô ich si rief in mîner nôt:
dô was ir helfe an mir tôt.
dar umb wil ich si varn lân.
ich wil mich an einen got verlân,
der himele und erden gwaltec ist, 1805
den man dâ nennet Jhêsu Krist.’

Eins morgens, was ein suntac,
daz liut noch slâfende allez lac,
ze Îlsunge er dô gie,
die rede er alsus ane vie, 1810
er sprach ‘Îlsunc, edeler degen,
du solt mir dînen rât geben
wie ich kristen werde für wâr
und mir gebe der fürste hulde gar.’

dô sprach IIsunc der degen 1815
 'den rât wil ich dir geben
 der dir wol mac guot sîn
 gên gote und gên dem herren dîn.
 ich wil dir genzlfch gewinnen
 urloup an allen dînen dîngen.' 1820

Dô gienc IIsunc zehant
 dâ er sînen herren vant.
 er sagte im diu mære
 waz im ze sinne wære.
 des fröute sich her Dietrich. 1825
 er hiez in bringen für sich,
 'nu sage mir die wârheit,
 wil du enphân die kristenheit?
 daz soltu vil gütelichen tuon
 âne allen valschen ruom. 1830
 sô gibet dir got ze lône
 die êwigen krône.'

dô sprach der kleine Laurîn
 'herre, ich wil bereit sîn,
 enphâhen willeclîch den segen 1835
 den got der kristen hât gegeben.'

Dô sante er Dietrich zehant
 dâ man Hildebranden vant
 und ander sîne dieneſtman:

die kâmen alle für gegân. 1840
dô sante man sâ zehant
dâ man sînen kapelân vant.
er hiez in segenen den touf.
dâ wart ein grôzer zuolouf
von den gesinden allen dô: 1845
die wurden alle vil frô.
Dietrich sprach dem gesinde zuo
'nu râtet wie ich im tuo,
wie wir im einen namen geben
der im wol zeme ze kristenleben.' 1850
ez sprâchen alle 'sînes namen
des endarf er sich niht schamen:
dâ bî ist er wol erkant
über al in dem lant.'
des volgete er in dâ. 1855
er wart getoufet sâ.
her Dietrich wart dâ sîn tote,
Ilsunc ez ouch gerne tete.
Ilsunc der kûene degen
der half im der kristen leben. 1860
dô ez dâ den touf enphie,
her Dietrich dô mit im gie
in sînen palas wîte.
dâ hiez er an der zîte

sine herren alle für in gân, 1865
 er sprach 'swes ich gedâht hân,
 ich wil hiute mîme toten geben
 daz er deste frôer mûge leben.
 ich wil im swern einen eit
 ganzer friuntschaft unde sicherheit, 1870
 lîp und guot ich teilen wil
 mit im unz an sîns endes zil.
 ouch muoz er mir her wider swern,
 er welle mich des selben wern.'
 Laurin im ûf die fûeze neic, 1875
 vor frôuden lange er stille sweic.
 her Dietrich zôch in von der erde,
 dô sprach Laurin der werde
 'herre, ich wil lîp unde leben
 allez ûf iwer genâde geben.' 1880
 dô swuoren si die friuntschaft,
 diu sît hete grôze kraft
 und niemer mêr zebrochen wart
 unz an ir beider hinvart.
 man hiete in fûrbaz êrlich, 1885
 lêrt in den glouben gerlich,
 wie ez solte dienen gote;
 daz lernte ez ân allen spot.

Bech, F., Verzeichnis der alten Handschriften und Drucke in der Domherren-Bibliothek zu Zeitz. Lex-8. 1881. M. 5.

Bibliotheca rerum Germanicarum ed. Philippus Jaffé. 6 Tomi gr. 8. 1864 — 73. M. 88 —

Einzel: Tom. I: Mon. Corbeiensis. M. 12. — Tom. II: Mon. Gregoriana. M. 14. — Tom. III: Mon. Moguntina. M. 14. — Tom. IV: Mon. Carolina. M. 14. — Tom. V: Mon. Bambergensis. M. 16. — Tom. VI: Mon. Alcuiniana edd. Wattenbach et Dümmler. M. 18.

Dannenberg, H., die deutschen Münzen der sächsischen und fränkischen Kaiserzeit. Mit einer Karte von H. Kiepert und LXI Tafeln Abbildungen. 2 Bände. 4°. 1876. cart. M. 40.

Ecclesiae Metropolitanae Coloniensis codices manuscripti descripserunt Philippus Jaffé et Guilelmus Wattenbach. hoch-4°. 1874. M. 12.

Heldenbuch, deutsches. I.—V. Teil. gr. 8. M. 42.

Einzel: I. Teil: Biterolf und Dietleib, herausgegeben von Jänicke. 1867. M. 8. — II. Teil: Alpharts Tod, Dietrichs Flucht, Rabenschlacht, herausgeg. von Martin. 1866. M. 8. — III. Teil: Ortnit und die Wolfdieteriche, herausgeg. von Amelung und Jänicke. I. Bd. 1871. M. 8. — IV. Teil: Ortnit und die Wolfdieteriche, herausgeg. von Amelung und Jänicke. II. Bd. 1873. M. 10. — V. Teil: Dietrichs Abenteuer, herausgeg. von Zupitza. 1870. M. 8. —

Kaiser-Urkunden in Abbildungen, herausg. von H. v. Sybel u. Th. Sickel. Lief. 1—7. quer folio. 1880—1884. Subscriptionspreis à M. 30. Einzelne Lieferung à M. 45.

Martin, Ernst, mittelhochdeutsche Grammatik nebst Wörterbuch zu der Nibelunge Nôt, zu den Gedichten Walthers von der Vogelweide und zu Laurin. Für den Schulgebrauch ausgearbeitet. Zehnte verb. Aufl. 1882. M. 1. —

Mätzner u. K. Goldbeck, altenglische Sprachproben. I. Band. 1. u. 2. Abteilung. II. Band. 1. u. 2. Abteilung. Lex. 8. 1867—85. M. 60.

Einzel: I. Band: Sprachproben. 1. Abteilung: Poesie. 1867. M. 12. — 2. Abteilung: Prosa. 1869. M. 12. — II. Band: Wörterbuch. 1. Abteilung A—D. 1878. M. 20. 2. Abteilung E—H. 1885. M. 16.

Müllenhoff, Karl, Altdeutsche Sprachproben. Vierte Auflage besorgt von Max Roediger. 1886. M. 3,60 Pf.

— deutsche Altertumskunde I. Band. I. Buch. Phoenizier. II. Buch. Pytheas von Massalia. Mit einer Karte von H. Kiepert. 1870. M. 10. —

— — V. Bd. I. Abth. Ueber die Vqluspà. 1883. M. 10.

Roediger, M., die Litanei und ihr Verhältniss zu den Dichtungen Heinrichs v. Melk. gr. 8. 1876. M. 2.

— **Paradigmata** zur altsächsischen Grammatik, im Anschluss an Müllenhoffs Paradigmata für seine Vorlesungen zusammengestellt. 1883. 30 Pf.

— kritische Bemerkungen zu den Nibelungen. gr. 8. 1884. M. 2,40.

Sammlung englischer Denkmäler in kritischen Ausgaben. I.—V. Bd. gr. 8. 1880—1885. M. 29,60. Ausgabe auf Kupferdruckpapier M. 43.

Einzel: I. Band: Aelfrics Grammatik und Glossen von Zupitza. I. Abteilung. 1870. M. 7. Ausg. auf Kupferdruckpapier M. 10. — II. Band: Thomas of Erceldoune von Brandl. 1880. M. 3,60. Ausg. auf Kupferdruckpapier M. 5. — III. Band: The Erl of Tolous and the Emperes of Almayn von Lüdtk. 1881. M. 6. Ausg. auf Kupferdruckpapier M. 9. — IV. Band: Wulfstan von Napier. I. Abteilung. 1883. M. 7. Ausg. auf Kupferdruckpapier M. 10. — V. Band: Floris and Blancheflur von E. Hausknecht. M. 6. Ausg. auf Kupferdruckpapier M. 9.

Scherer, Wilh., zur Geschichte der deutschen Sprache. Zweite Ausgabe. 1878. M. 10.

— Geschichte der deutschen Litteratur. 3. Aufl. gr. 8. 1855. geb. in Leinwand M. 10, in Halbfranz M. 11.

Schum, Wilh., exempla codicum Amplonianorum Erfurtensium saeculi IX—XV. Mit 55 Lichtdruck-Abbild. auf 24 Bl. gr. fol. 1882. M. 20.

Das vollständige Verzeichniss befindet sich im Druck.

Waitz, Georg, deutsche Verfassungsgeschichte. 8 Bände. gr. 8. M. 111.

Einzel: I. Band: Die Verfassung des deutschen Volks in ältester Zeit. 3. Aufl. 1880. M. 12. — II. Band, 1. Abtlg.: Die Verfassung des fränkischen Reichs. I. Band, 1. Abtlg. 3. Aufl. 1882. M. 10. — II. Band, 2. Abtlg.: Die Verfassung des fränkischen Reichs. I. Band, 2. Abtlg. 3. Aufl. 1882. M. 10. — III. Band: Die Verfassung des fränkischen Reichs. II. Band, 2. Aufl. 1883. M. 16. — IV. Band: Die Verfassung des fränkischen Reichs. III. Band. 2. Aufl. 1885. M. 16. — V. Band: Die deutsche Reichsverfassung von der Mitte des 9. bis zur Mitte des 12. Jahrhunderts. I. Band. 1874. M. 11. — VI. Band: Die deutsche Reichsverfassung von der Mitte des 9. bis zur Mitte des 12. Jahrhunderts. II. Bd. 1875. M. 12. — VII. Band: Die deutsche Reichsverfassung von der Mitte des 9. bis zur Mitte des 12. Jahrhunderts. III. Bd. 1876. M. 11. — VIII. Band: Die deutsche Reichsverfassung von der Mitte des 9. bis zur Mitte des 12. Jahrhunderts. IV. Bd. 1878. M. 13.

